

Maañgo, Talaash Karo Aur Dastak Do.

Injeel : Mattā 7:1-14

[Īsā^(a.s) ne logoñ ko taaleem dete hue kahā,] “Tum dusroñ ke liye sakhti se faislā nā karo aur tumhaare liye bhī naheen kiyā jaaegā.⁽¹⁾ Tum jis tarah se dusroñ ke hak me faislā karte ho, tumhaare liye bhī usī tarah se faislā kiyā jaaegā. Allaah rabbul kareem tumheñ bhī waise hī maaf kar degā jaise ki tum dusroñ ko kar dete ho.⁽²⁾ Tumheñ apne bhaaī kī āñkh me paḍī huī thoḍī sī dhul kaise dikh jaatī hai, jabki ḳḥud apnī āñkh me paḍī huī gañdagī tumheñ pareshaan naheen kartī?⁽³⁾ Tum apne bhaaī se kahte ho, ‘Bhaaī, āo main tumhaari āñkh ko saaf kar duñ.’ Tum ye kyuñ kahte ho? Tum apnī āñkh me paḍī gañdagī ko kyuñ naheen nikaalte?⁽⁴⁾ Tum bahut farebī ho! Pahale apnī āñkh saaf karo tabhī tum apne bhaaī kī āñkh me paḍī gañdagī ko dekh kar nikaal paaoge.⁽⁵⁾

“Tum log paak cheezon ko kutte ke saamne mat ḡaalo. Apne motiyon ko suwron ke saamne mat phenko. Wo unheñ sirf apne pairon ke neeche kuchaleñge aur kutte tum par palaṭ kar hamlā kareñge.⁽⁶⁾

[Īsā^(a.s) ne kahā,] “Tum log maañgte raho aur tumko mil hī jaaegā. Apnī talaash jaarī rakho, aur tum use haasil kar hī loge. Darwaaze par dastak dete raho, aur wo tumhaare liye khul hī jaaegā.⁽⁷⁾ Haañ, jo maañgnā naheen ḥoḍegā, usī kī muraad purī hogī. Wahī use ḡhuñḡh paaegā jo apnī talaash ko jaarī rakhegā. Wo inṣaan hī apne liye darwaazā khulwā legā jo us par dastak detā rahegā.⁽⁸⁾

“Suno! Agar tumhaarā beṭā tumse roṭī maañge to tum kyā karoge? Tum me se kaun hai jo use patthar degā?⁽⁹⁾ Yā agar tumhaarā beṭā machlī maañge, to kyā tum use saarñp doge?⁽¹⁰⁾ Tum log gunaahgaar ho kar bhī ye jaante ho ki apnī aulaad ko kyā acḥḥī cheez denī chaahie, to phir tumhaarā parwardigaar bhī maañgne waale ko acḥḥī cheezen hī degā.⁽¹¹⁾

“Islie, hameshā tum dusroñ ke saath waisā hī karo jaisā tum apne liye pasañd karte ho. Yahī Musā^(a.s) kī shareeyat aur nabiyon kī taaleem kā sahī matlab hai.⁽¹²⁾

“Tañg darwaaze se hī [Allaah taa’alā kī saltanat ke] añdar jao. Baḍā darwaazā aur āsaan raastā sirf barbaadī kī taraf le kar jaatā hai.⁽¹³⁾ Lekin jo darwaazā ḥoṭā aur jiskā raastā tañg ho, to wo hī tumko behtareen zindagī kī taraf le jaaegā. Is raaste ko bahut hī kam log hī ḡhuñḡ paate haiñ.”⁽¹⁴⁾